

共同經課-1 使徒行傳一章十五節～十七節、二十一節～二十六節

15 當時，同聚集的眾人，約略一百二十名，彼得佇兄弟中倚起來，16 講：「兄弟啊，聖神借大衛的嘴，所識語導人掠耶穌的猶大的，此個聖經應驗是應該。17 因為伊曾及阮同列，閣佇此個工亦有份。21 所以，主耶穌佇咱中間出入的時，22 對約翰行洗禮起，到耶穌離別咱受接接的日，所有常常及阮做伴的人，佇 in 中間著有一個及阮相及做伊復活的干證。」23 對按呢舉二人，就是約瑟叫做巴撒巴，亦名猶士都，閣一個是馬提亞。24 就祈禱講：「主啊，你是識眾人的心的，佇此二人中，指明叨落一人是你所揀的，25 來有份佇此個工及使徒的職。就是猶大所離開，欲去伊家己的所在的。」26 對按呢給 in 拈鬮，拈著馬提亞；伊就及十一個使徒同列。

共同經課-2 詩篇一篇

1 無行歹人的計謀，無倚罪人的路，無坐侮慢的人的位，此號人有福氣！2 伊所歡喜的就是耶和華的律法，暝日三思的，也是伊的律法。3 伊欲親像樹栽佇溪邊，照時結果子，伊的葉也袂乾去。伊所做的一盡亨通。4 歹人毋是按呢，是親像粗糠互風吹散。5 所以，佇審判歹人倚袂住；罪人佇義人的會中亦是按呢。6 因為耶和華知義人的路；若是歹人的路會滅無。

共同經課-3 約翰壹書五章九節～十三節

9 人的干證咱若承受伊，上帝的干證是卡大，因為上帝的干證是此個，就是論伊的子伊有做干證。10 信上帝的子的人，佇本身有此個干證；毋信上帝的人，便是互伊做白賊的，因為伊未有信上帝論伊的子所做的干證。11 閣彼個干證是此個，就是上帝已經將永活互咱；也此個活是在佇伊的子。12 有伊的子的就有活，無有上帝的子的就無有活。13 我寫諸個互恁信上帝子的名者，欲互恁知恁有永活。

共同經課-4 約翰福音十七章六節～十九節

6 「你所賞賜我出佇世間的人，我已經用你的名對 in 顯明。in 本是你的，你用 in 賞賜我，in 亦已經守你的道理。7 今 in 知，見若你所互我的，攏是對你來；8 因為你所互我的話，我已經互 in，in 承受伊，亦確實知，我對你出，閣信你差我。9 我為著 in 求，毋是為著世間求，就是為著你所互我的人，因為 in 是你的。10 見若我的，就是你的；你的就是我的，閣我佇 in 有得著榮光。11 今了後，我無佇世間，in 佇世間；我歸佇你。聖的父啊，願你佇你的名就是你所互我的來保守 in，互 in 做一個親像咱一樣。12 我及 in 佇咱的時，曾佇你的名，就是你所互我的來保守 in，我亦有照顧 in；其中無一個沈淪，只有彼個沈淪的人若定，互聖經得著應驗。13 今我就近你，我猶惦世間講諸個話，欲互 in 有我的歡喜滿滿佇 in 的心內。14 我已經將你的道理互 in。世間怨恨 in；因為 in 無屬世間，親像我無屬世間。15 我毋是求你互 in 出世間，就是保守 in 脫離歹的。16 in 無屬世間，親像我無屬世間。17 願你用真理互 in 成聖；你的道理就是真理。18 親像你差我入世間，我亦有差 in 入世間。19 我為著 in 來做聖，互 in 亦對真理來成聖。